

**PERKASA bantah kakitangan rasis digantung tugas  
Malaysiakini.com  
November 11, 2010**

Pertubuhan Pribumi Perkasa Malaysia (PERKASA) membantah tindakan kerajaan menggantung tugas seorang pengetua di Kulai Jaya, Johor dan timbalan pengarah Biro Tata Negara (BTN) yang didakwa mengeluarkan kenyataan yang berbaur rasis.

Sehubungan itu, naib presiden PERKASA, Zubir Harun (dua dari kiri) mendesak kerajaan supaya mengkaji semula tindakan tersebut.

"Yang membuat keputusan adalah ahli jawatankuasa disiplin dan ia lebih kepada keputusan pentadbiran atau pengurusan.

"(Mereka) bukan diadili di mahkamah, (mereka) tidak diadili melalui satu proses undang-undang yang sebenarnya," kata Zubir dalam satu sidang akhbar di ibunegara petang ini.

Menurutnya, PERKASA bersedia membantu menyediakan khidmat guaman untuk kedua-dua individu itu sekiranya mereka bercadang mengambil tindakan undang-undang.

Zubir mengulas mengenai jawapan Menteri di Jabatan Perdana Menteri Datuk Seri Mohd Nazri Abdul Aziz di Dewan Rakyat kelmarin yang menyatakan kedua-dua individu terbabit telah dihukum.

Dalam sidang akhbar itu juga, timbalan presiden PERKASA, Datuk Abdul Rahman Bakar kesal dengan tindakan kerajaan tersebut yang menurutnya "begitu pantas mengambil tindakan terhadap mereka".

"Sedangnya banyak isu-isu perkauman yang dibawa oleh bukan Melayu, tidak diambil tindakan oleh kerajaan.

"PERKASA merasakan seolah-olah apa sahaja yang disuarakan oleh orang Melayu akan dianggap semuanya salah, kalau ia tidak menguntungkan kaum Cina," katanya ketika membaca satu kenyataan.

Abdul Rahman juga sebaliknya mendakwa apa yang disuarakan oleh kaum itu "dianggap semua tidak salah biar pun tindakan kaum Cina tersebut mencabar perkara-perkara di dalam Perlembagaan Negara".

Beliau berkata, pihaknya mempersoalkan bahawa pertubuhan itu dituduh rasis apabila bercakap soal hak orang Melayu, sedangkan pertubuhan Cina menolak sekolah satu aliran dan mempertahankan sekolah aliran Cina, tidak dianggap rasis.

"Lihat sahaja produk sekolah Cina seperti Namewee yang penuh dengan sikap rasis, kurang ajar dan tidak mampu berbahasa kebangsaan. (Dia) tidak pula dikecam oleh pemimpin Cina baik dari BN mahupun Pakatan Rakyat.

"PERKASA merasa kesal dengan tindakan kerajaan yang begitu cepat mendenda iklan raya TV3 sebanyak RM50,000 kerana menyentuh sensitiviti kaum tetapi video Namewee terlepas daripada tindakan," katanya.

Sehubungan itu, beliau mendesak peguam negara supaya "tidak berlengah-lengah" mengambil tindakan undang-undang terhadap Namewee.

"Kegagalan kerajaan berbuat demikian akan menyebabkan lebih ramai bukan Melayu seperti Namewee akan muncul dan ini akan menyebabkan kerajaan huru-hara," katanya.

Abdul Rahman juga mendesak peguam negara supaya mengambil tindakan terhadap Malaysiakini kerana didakwa menghina sultan-sultan Melayu apabila mendakwa bahawa mereka berada di bawah telunjuk Umno.

Beliau merujuk kepada segmen suara pembaca dalam Malaysiakini - Your Say - yang bertajuk "The Day Ibrahim Ali's mouth goes numb" yang disiarkan pada bertarikh 14 oktober lalu.

Menurutnya, PERKASA berpendapat Malaysiakini tidak boleh berselindung di sebalik pandangan pembaca kerana sebagai penerbit, mereka harus bertanggungjawab.

Sementara itu, Ketua Wira perkasa Arman Azha Abu Hanifah pula berkata pihaknya akan mengadakan rundingan meja bulat dengan NGO, tokoh agama dan wakil majlis agama Islam berhubung cadangan kerajaan mahu menjadikan Malaysia hab hiburan.

Sebelum ini, PERKASA membantah cadangan kerajaan itu yang membabitkan penubuhan beberapa kelab malam, menganjurkan konsert dan zon hiburan di lima negeri.

Menurutnya, rundingan itu akan dibuat selepas Hari Raya Haji.

"Kita akan mendapatkan pandangan akar umbi Melayu, dari ulama dan Majlis Agama Islam.

"Apabila mendapat kata putus, kita akan bertemu dengan kerajaan," katanya ketika ditemui selepas sidang akhbar tersebut.